

# INUIT ATAQATIGIIT INATSISARTUNI



22. april 2026

UPA2026/134

## Naqqiut

Siunnersuut 20. januar 2026-meersoq taarserpaa

(Allangortinneqarpoq siunnersuuteqartup atia Inatsisartunut ilaasortaq Mariane Paviasen Jensen, Inuit Ataqatigiit taarserneqarpoq Inatsisartunut ilaasortaq Pipapuk Lyngø, Inuit Ataqatigiit)

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Innuttaasut atsiornernik katersinermikkut siunnersuutini Inatsisartuni suliarineqartussanik saqqummiussisarnissaat siunertaralugu Naalackersuisut aaqqissuussinermik pilersitseqqullugit peqquneqarnissaannik Inatsisartut aalajangiiffigisassaattut siunnersuut.**

(Inatsisartunut ilaasortaq Pipaluk Lyngø, Inuit Ataqatigiit)

## Tungavilersuut:

Nunarput tassaavoq tamat oqartussaaqataaffigalugu ingerlatsivigissallugu innuttaasut suleqataaffigisariaqagaat.

Ammasumik peqataatitsisumik ingerlatsinissatsinnut inatsisartuni ilaasortaasugut pisussaaffeqarpugut annertuumik, tamannalu qulakkeerniarlugu ingerlatsinermi inatsit ilaatigut uagutsinnut inatsisartuni qinikkatut sulinitsinni inuiaqatigiinni siunnersuutigittinneqarusutat eqaannerusumik suliarineqarsinnaanerit angusariaqarparput.

Nunatsinni innuttaasut inatsisissanik nutaanik suliakkiisnnaasariaqarput aammali inatsisinik atuutereersunik allangortitsisariaqarnitsinnik siunnersuuteqarlutik suliakkiisnnaasariaqarput, tamannami pingaarutilerujussuuvuq nunatut tamat oqartussaaqataanerannik ingerlanitsinni.

Aalajangiiffigisassatut siunnersuutigisanni anguniagara tassaavoq innuttaasut nammineerlutik suliniuteqarlutik isumaqatigiissuteqarlutik atsiornernik aalijangersimasunik amerlassusilinnik katerseriarlutik Inatsisartuni siunnersuutip aalajangiiffigineqarnissaanik siunnersuuteqarsinnaanissaat. Taamaaliorniarnermilu inatsisinik allangortitsineq imaluunniit inatsisinik nutaamik pilersitsinissaq pisariaqarmat Naalackersuisut siunertamut tamatuminnga suliaqarnissamut Inatsisartunit peqquneqassasut siunnersuutigaara.

Taamak iliorneq tassaavoq innuttaasunik ullumikkorniit annerusumik peqataatitsinermik kinguneqartussaq, nunatsinni nammineerluta ingerlatsisnnaanermik periarfissagissaartuuvugut, qularutigingilaralu

qinikkatut sulisuusugut tamatta pingaartilluinnaripput innuttaasut kiffaangissuseqarluarlutik oqartussaasunut suliakkiillutik siunnersuuteqarsinnaanissaanik periarfissamik pilersitsinissamut kajumissuseqartut.

Nunarpummi isorartoorujussuuvoq, qinikkatullu sulinitinni amerlasuutigit ajornakusoorsinnaasarpoq piffiit tamaviisa tikissinnaanissaat qinigaaffiup ataatsip iluani, taamaammat ullutsinni atortorissaarutit pitsaasut periarfissaasut atorluarnerusariaqarparput, isumaqarpungalu periarfissaq una innuttaasut namminneq suliniuteqarlutik anguniagaqaqatigiillutik suliaqarsinnaanerini ammaaneq aamma qinikkatut suliaassanik ulluinnarni innuttaasut atugaanik pitsanngorsagassanik pisarialinnik suliakkerneqarsinnaanerput piffissaalluortoq atuutilersinneqarnissaminut.

Qilanaarpunga partiit isumaat tusassallugu, neriullunga oqartussaaqataanermik, kiffaangissuseqarnermik tamallu oqartussaaqataanerannik pingaartitsillutik siunnersuut tapersersinnaassagaat.

### **Pisortanut aningaasatigit allaffissornikkullu kingunerisassai:**

Siunnersuutip atuuttussanngortinneqarnera innuttaasut siunnersuutaannut immikkut malittarisassanik suliaqarnissamik pisariaqartitsiviussaaq. Allaffissornikkut atorineqartussat, nutserisitsineq ilanngullugu, ukiup affaanit ukiumut ilivitsumut atorfiup nalinganit annertunerussanngitsut ilimagineqarpoq.

Tamatuma saniatigit siunnersuutip atuuttussanngortinneqarnera qarasaasiakkut aaqqiissummik ineriartortitsinermik ingerlatsinissamillu tunngavissaqartinneqarpoq.

Folketingi nammineq innuttaasut siunnersuutaanut atorineqartartumik, tassani ukiuni siullerni marlunni (2018-2019) isumaginera sullinneqarneralu ilanngullugit, qarasaasiakkut aaqqiissummik ineriartortitsinera 1 mio. koruunit missaannik akeqarpoq. Ingerlatsinerup nanginnera borgerforslag.dk-milu nittartakkakut quppernermik ineriartortitseqqinneq 2020-mi 870.000 kr-it missaannik naleqarpoq. Aningaasartuutit kingorna ukiumut 570.000 koruunit missaanniittutut nalilerneqarput.

Kalaallit Nunaanni qarasaasiakkut aaqqiissusiorneq ingerlatsinerlu minnerpaamik tamatuma annertoqqataanissaq ilimagineqartariaqarpoq. Sanillersuutassatut siusinnerusukkut jobportalip ingerlanneqarneranut ataavatumillu ineriartortinneqarneranut aningaasanut inatsimmi ukiumut 900.000 kr-t missaat immikkoortinneqartarput. Aningaasartuutinulli qarasaasiakkut aaqqissut pilersuisussallu sorliup toqarneqarnera apeqqutaassaaq.

Tamatuma saniatigit allaffissornermi isumalluutit aaqqissuussinermik ingerlatsinermut atorineqartut ilanngunneqassapput. Folketingip tassunga aningaasartuutai ukiumut 1,1 mio. koruunit missaanniipput (2022-mit kisitsisit).

Nunatsinni innuttaasut siunnersuutaannik aaqqissuussinermi allaffissornikkut isumalluutit atuinermi pissutsit arlallit apeqqutaassapput, tassani ingammik siunnersuutit tiguneqartut amerlassusaat apeqqutaassalluni. Allaffissornermi isumalluutit nutserinermut, siunnersuutit misissuinnermut immaqalu ataatsimiititaliap suliarinninneranut ingerlassapput. Isumalluutit taakku AC-p ukioq ilivitsup aningaasarsiaatut ukiumut 500.000 koruunisut annertussuseqassapput.

**Namminersortunut aningaasaatigut allaffissornikkullu kingunerisassai:**

Soqanngilaq.

**Innuttaasunut aningaasaatigut allaffissornikkullu kingunerisassai:**

Soqanngilaq.